

明

史

明史卷三百八十一

忠義傳

忠義六

黃世清字澄海滕縣人父中色吏部員外郎世清登崇禎七年進士除戶部主事榷稅許墅閩有清操歷員外郎郎中出為山西僉事分巡冀寧道遷陝西右叅議分守商維駐商州其城屢遭兵燹四野蕭然民皆入保城中而客兵所過淫掠民苦兵甚於賊世清下令毋許擅入城未幾閩中兵經其地世清申前令有二卒搥傷門者即撈之以徇自是稍戢督撫發兵往來必誡曰毋犯黃叅議令李自成大躡荆襄遠近

震動世清一子方幼屬其友人養之誓以身殉十六  
年十月自成入潼關遣其右營十萬人從南陽犯商  
州世清率士民憑城守禦繼死士殲其六七十人有  
奸民投賊至城下說降世清與之語密遣砲手擊斃  
之懸其首城上令之曰懷二心者視此士民皆效死  
砲矢盡繼以石石盡婦人掘街砌繼之初九日城陷  
世清危坐堂上麾其僕朱化鳳去化鳳願全死賊牽  
世清下堂化鳳叱曰奴才不得無禮賊批其頰化鳳  
聲色愈厲執至賊帥袁宗第營世清植立不跪賊欲  
屈世化鳳曰奴才真不解事吾主堂堂憲司肯拜賊

耶賊先殺之授世清以防禦扎怒罵不受與一家十  
三人皆遇害贈光祿寺卿

楊暄高平人崇禎十三年進士為渭南知縣老成厚  
重得民和歲大凶畢力拯救奸人乘機行劫斃之杖  
下民稍獲安性約素飲食服御不異布衣時十六年  
十月李自成敗孫傳庭軍長驅入關兵備僉事藍山  
楊王休叛降潼關衛教授許嗣復分守上南門城破  
持挺格鬪詈賊死妻女被掠亦皆自殺賊兵遂抵渭  
南暄時已擢兵部主事未行與學官蔡姓者全守會

舉人王命誥開門迎賊暄被縛索印不予詬罵死學  
官亦死之賊遂陷西安屬邑望風降附蒲城知縣朱  
一統獨謀拒守曰吾家七世衣冠安可臣賊或言他  
州縣出身甲榜者皆已納款一統曰此事寧論資格  
耶以軀體肥大令家人擴井口以待會衙兵叛奪印  
趣迎降一統瞋目叱曰吾一日未死印不可得也至  
日暮左右盡散度事不可為從容赴井死縣丞沁源  
姚啓崇亦死焉一統平定人起家乙榜有朱迥漢者  
潘府宗室也由宗貢生為白水知縣明習吏事下不  
敢欺賊潛入城猶手弓射賊與學官魏歲史劉進並  
被讎

黃綱字季侯光州人元衮萬曆中舉進士仕至山東  
右叅政綱舉天啓二年進士授南宮知縣有政聲入  
為兵部主事調禮部進員外郎崇禎中歷紹興知府  
淮海兵備副使以憂歸七年流寇陷光州子彝如督  
家僮巷戰罵賊死其妹亦被難綱以省墓故獲免服  
除起臨鞏兵備副使賊李自成等亂關中綱請調番  
兵合勦果大破賊于潼關原尋以右叅政分守洮岷  
十五年擢陝西按察使明年十月七日自成入潼關  
十三日陷西安巡撫馮師孔殉難布政使陸之祺以  
下迎降惟綱及秦府左長史章尚綱長安知縣吳從

義指揮崔爾達死之綱被執自成勸之降叱曰疇昔  
潼關之戰汝固我之戮餘也今日肯降汝耶妻王氏  
先赴井死綱得間亦赴井死贈太常卿謚忠烈尚綱  
會稽人開城陷投印井中冠服趨王府端禮門再拜  
自縊贈按察副使從義浙江山陰人舉崇禎十三年  
進士知長安時謁選者率營善地從義獨曰朝廷待  
士子厚避危彊不就豈臣子分諷且吾儕貧士倘稱  
貸以圖後不剝民償耶其志搢如此長安比歲兵荒  
力請於上官委曲賑恤時裁縣設練總募丁壯三百  
人縶之一聞禦寇輒股栗色變從義親為訓練士皆

可謂值官軍勦南山寇從義率所部夾擊果有功秦  
府宗室及薦紳佔業居十之四名為寄庄無他役役  
獨累細民及督師孫傳庭駐大軍西安征求百出悉  
取辦長安咸寧二縣從義不憚強禦並令豪族均輸  
民力稍寬至是西安陷從義從容下城釋戎服襲冠  
裳墮關叩頭殺井死贈按察僉事爾達西安右衛指揮  
亦赴井死有丘從周者為都司吏長不滿三尺強直  
敢言見自成所為暴虐乘醉直詣其前罵曰若一小  
民今妄踞王府將僭稱偽號而所為若此何以得長  
久賊怒砍殺之



祝萬齡成寧人父世喬有至行以父遠遊久不歸年  
十五即獨身訪求歷數千里屢瀕於死卒得之後以  
選貢生為南康府通判以清慎稱萬齡從鄉人馮從  
吾遊早有立志舉萬曆四十四年進士累官保定知  
府天啓六年魏忠賢盡毀天下書院萬齡形之嘆息  
其黨李魯生遂劾萬齡倡訛言謂天變地震物怪人  
妖悉由毀書院所致非聖誣天其志甚惜萬齡遂落  
職閑住崇禎初用薦起黃州知府為政峻而不苛吏  
民畏愛興賢旌善奸宄多化為良民嘗曰吾輩讀聖  
賢書成進士第奈何一領簿牒遂棄之若遺吾欲與

諸公講明之因集定惠書院時啓迪以聖學諸生悅  
之稱為閩西夫子居三年遷河南按察副使監軍磁  
州輝縣之北與山西陵川之南有村曰水峪回賊竊  
據數十年大為民患四年春萬齡與山西監司王肇  
生合兵夾擊萬齡所遣二將六戰皆捷焚其巢三百  
餘賊遂平副將蔡忠將解任萬齡以兵籍虛冒誥之  
忠遂諷中軍何際鳳等擁衆鼓譟萬齡既撫定于巡  
撫吳光義光義以聞際鳳等抵法忠亦獲罪錄平寇  
功加右叅政明年流賊自山西入河北以千騎掠新  
鄉萬齡督毛兵八百人邀擊之賊走陵川已而復大

至萬齡拮据兵食勞勩甚著竟坐失事削籍歸河南  
府推官湯開遠訟其冤不納久之廷臣交荐部議將  
起用未及而西安陷萬齡深衣大帶趨至關中書院  
哭拜先聖投環死一時同死者前懷慶府通判咸寧  
竇光儀前儀封知縣長安徐方敬前芮城知縣咸寧  
徐芳聲舉人宗室朱誼眾俱投水死

唐時明字爾極固始人舉于鄉崇禎中為長垣教諭  
縣有杏壇久廢捐俸修之子路墓舊有祀田為豪家  
所奪悉復其故入為國子學正累遷鳳翔知府十六  
年七月聞李自成入潼關亟繕城濬濠儲餉治毬為

戰事偪俄潰兵逼其地大掠而西人無固志及自成  
據西安分兵寇旁郡與史董尚質等開門迎賊時明  
遂自經未死為賊所得其偽相牛金星說之曰吾主  
求賢若渴君至西京自不次擢用時明張目叱之曰  
我天朝命吏恨不能滅賊乃欲我臣賊耶金星去令  
尚質說之時明怒厲聲責數之尚質慚退賊令縛赴  
西安時明託其妻子於友人遂就道至興平縛偶釋  
乘間自縊明日尚質在鳳翔亦發狂暴死鳳翔既陷  
屬城叛降隴州同知薛應玠武進人時攝州事獨勒  
兵拒守力屈城陷誓賊死寶雞知縣唐夢鯢番禺人

舉於鄉授福寧州學正歷知仙居天台富川分水四  
縣在富川有撫搖功坐累謫池州府經歷攝賈池縣  
事值左良玉擁兵東下鄉民數萬避兵求入城守者  
不納夢鯤獨主納之及改竇雞賊已逼潼關衆勸勿  
往不從星馳抵任賊已陷鳳翔屬邑皆下十二月夢  
鯤知不可守自縊死

朱新鐸晉府宗室也家汾州崇禎十四年由宗貢生  
為中部知縣見民生憔悴悽然泣下繪圖將入告會  
有事他邑土寇乘間陷其城坐免官圖不果上已而  
復僞署事者聞賊入關亟欲解印去惴惴恐不即受

新鐮毅然曰受國恩無以報此吾致命之秋也即受之未幾賊傳檄至新鐮方巡城怒而碎之議拒守然邑新遭寇人情瓦解乃屬父老令速去而已誓必死妻盧氏妾薛氏馮氏請先自盡許之有女方數歲新鐮拊其背而勉之繼左右皆泣下乃書表封印使人馳送京師冠帶望闕拜又望拜其母即自經士民藿之社壇側以妻女祔先是土寇薄城縣丞光先與戰不勝遂自焚新鐮歸哭之慟曰殺身成仁雖死猶生至是亦死難

段復興字仲方陽穀人崇禎七年進士授南京戶部

主事歷員外郎出為陝西右叅議分守慶陽十六年  
十月李自成據西安傳檄諭降復興裂其檄集衆議  
守踰月賊兵薄城圍之數匝城上砲石雨下賊積屍  
滿濠而攻圍不退復興勢力不支拜辭其母聚妻妾  
四人及一子一女於樓置薪其上復乘城督戰十六  
日城陷趨歸火其樓母亦赴火死乃持鐵鞭走北門  
擊殺數賊遂自刎士民塋之西河坪立祠祀之其同  
時死難者慶陽推官靳聖居安化知縣袁繼登聖居  
字淑孔長垣人崇禎元年進士歷知濟源萊陽二縣  
坐事謫河南布政使炤磨擢潞安府推官再被謫屢

遷秩萍慶陽乃如故時已授刑部主事未行遇賊佐復興死守城破被執罵不絕口死繼登南畿人起家選貢生涖任未浹歲即遭變見賊求速死賊乃殺之其陷寧州也知州董琬亦死之

簡仁瑞字季麟滎縣人由乙榜歷官西安府同知遷平涼知府十六年冬賊入關關中諸王宗室及監司以下官即謀遁走仁瑞上謁韓王曰賊雖西犯長安尚有重兵訛言不足信殿下輕棄三百年宗社欲何之縱賊兵壓境延寧甘涼諸軍足相救援即萬不能走同死社稷亦不辱二祖列宗王不從是夕其護卒



鼓譟扶王及諸郡王宗室斬關出奔并魯仁瑞行仁  
瑞曰吾平涼太守也吾去誰與守諸君自行其志毋  
強我衆遂去仁瑞乃撤四閤居民入城以土石塞其  
門為死守計未幾賊傳撤至衆益無固志乃召所活  
死囚數輩謂之曰吾昔生汝汝亦有以報我乎皆對  
曰惟命即託以幼子令衛之出城明日賊抵城下守  
陴者皆哭士民數人草降書乞僉名署印仁瑞怒厲  
聲叱責之遂正衣冠自經于堂上平涼既陷虜城悉  
降附華亭教諭鄒姓者援曾子居武城之義欲避去  
訓導何相劉止之曰吾輩已委贄為臣安可以賓師

自待乃率諸生共守及城陷與教諭並殉難

司五教字敬先內黃人幼失怙篤學有志行崇禎時以歲貢生為內丘訓導十一年內丘被兵佐長吏拒守有功遷城固知縣值群盜縱橫山民亦據險稱亂五教督兵殲滅之十六年冬賊據閬中分設偽官郡縣望風而靡五教激勵士民議固守有諸生密謀內應捕斬之竿其首城上無何偽帥田見秀擁兵至五教且戰且守斃賊多賊悉兵內攻四日而城陷見秀叱令跪厲聲曰朝廷命官肯為賊屈耶賊去其冠帶輒自取冠之罵益厲乃被磔

朱廷鄭晉府宗室也崇禎中為鞏昌府通判署秦州  
事為人廉直政尚嚴十六年冬賊陷秦州擁見賊帥  
使之跪叱曰我天朝宗姓頭可斷膝不可屈賊欲活  
之大呼曰今日惟求一死出外危坐神色自若乃見  
殺鞏昌屬城十有七其長吏盡節者廷鄭而外止應  
昌士王垣二人昌士仙居人尚書大猷之後由舉人  
為安定知縣地狹民貧無戰守具及賊迫與典史葉  
暹共守城賊環攻旬日不能克先任知縣王垣四川  
人以攝會寧縣事為賊所執至是賊遣之說降垣登  
城即勗以死守賊急攻陷之殺垣於城上執昌士戮

然不屈

尤世威榆林衛人與尤世功第世祿並勇敢知名天  
啓中世威積官建昌營叅將調守牆子路七年遷山  
海中節副總兵寧遠告警從大帥滿桂赴援力戰城  
東有功增秩受賜崇禎二年擢總兵官鎮守居庸昌  
平其冬京師戒嚴命提兵五千防順義俄命還鎮防  
護諸陵四年十二月代宋儒為山海總兵官積資至  
左都督七年我  
大清兵入宣府命偕寧遠總兵官吳襄馳援總督張  
宗衡與議進兵方畧襄厲聲曰我軍止外貌可觀耳

一交鋒悔何及二將遂擁兵不進事平為兵科常自  
裕等所劾並褫職論成未行會流賊躡河南詔世威  
充為事官與副將張外嘉分統閬門鐵騎五千往勦  
明年正月賊陷鳳陽世威以二千五百騎赴之抵亳  
州會總督洪承疇出關討賊次信陽命世威趨汝州  
甫二日承疇亦至時賊見河南兵盛悉奔入關中承  
疇將入關征討乃大會諸將令分防汝雒諸要害以  
世威所將皆勁旅令與叅將徐來朝分駐永寧盧氏  
山中以扼雒南蘭草川朱陽關之險戒之曰靈陝賊  
所出入汝勿懈及承疇既入關賊避之而南復由藍

由將走盧氏扼於世威仍入商雒山中來朝所部三  
千人不肯入山大謀雖撫定軍心遂不固後賊至來  
朝逃一軍盡亡世威軍暴露久大疫與賊戰失利世  
威及遊擊劉肇基羅岱俱負重傷衆大潰賊遂越盧  
氏走永寧事聞命解任候勘十年宣大總督盧象昇  
言世威善撫士曉軍機徒以數千客旅久戍荒山水  
土失調疾疫大作遂致失利今當用兵時棄之可惜  
乃命赴象昇軍自效及象昇戰沒自免歸十五年以  
廷臣薦命與弟世祿赴京候調比至召對中左門復  
告歸明年十月李自成陷西安傳檄榆林招降總兵

官王定懼率所部精卒棄城走時巡撫張鳳翼未至  
城中士馬單弱人心洶洶布政都任亟集副將惠顯  
叅將劉廷傑等議城守世威與里居諸帥王世欽世  
國候世祿拱極王學書李昌齡輩咸與焉昌齡故延  
綏總兵寓居榆林者衆推世威為主帥分陴固守無  
何賊十萬衆陷延安下綏德復遣使說降廷傑大呼  
曰長安雖陷三邊如故賊皆中州子弟殺其父兄而  
驅之戰必非所願榆林天下勁兵一戰奪其氣然後  
約寧夏固原為三師迭進賊可平也衆曰將軍議是  
世威奮曰受國厚恩敢忘報稱諸公既見推指麾三

軍惟老夫是任世欽前曰我輩世叨國恩豈為賊下  
礮兵秣馬予請一戰于是都任令于軍曰壯士一聽  
尤將軍違者殺無赦乃歃血誓師簡卒乘繕甲仗各  
出私財佐軍守具未脩賊已抵城下出戰敗之廷傑  
募死士乞師套部其衆將至賊分兵拒却之攻城益  
力官軍力拒賊死無筭益衆來攻守七晝夜賊乃穴  
城置大砲轟之城遂破世威等猶督衆巷戰賴人暨  
子亦發屋瓦擊賊賊屍相枕籍既而力不支俱死之  
侯世祿父子及學書俱不屈死世威世欽世國昌齡  
並被執賊怒廷傑勾套部磔之至死罵不絕口顯亦



被執大罵賊賊惜其勇繫至神木服毒死縛世威等  
獻自成自成坐秦王府欲降之四人不屈膝自成曰  
諸公皆名將助我平天下取封侯可乎衆罵曰汝驛  
卒敢大言侮我自成笑前解其縛世欽唾曰驛卒毋  
近前汚將軍衣自成怒皆殺之世欽大將威子官都  
督僉事與蕭如薰白兆慶分練三大營軍遷都督同  
知孫承宗設山海三大將用為左部總兵官言官欲  
去承宗先擊世欽遂謝病去崇禎八年洪承疇起之  
家擊李自成有功即謝歸十六年召對中左門未及  
用而歸遂死於賊世國威弟保定總兵官繼子由擲

溝總兵官罷歸甫數日竟拒賊以死世威從弟翟文  
為靖邊營副將嘗從洪承疇追聞王于鳳翔之宮亭  
大敗之斬首七百餘級至是率敢死士出南門奮擊  
殺傷過當中矢死又有尤岱者由部卒起家至山海  
鐵騎營叅將數有功忤上官棄職歸守水西門城陷  
自殺廷傑旣死其父副使彝鼎聞之不哭曰吾有子  
矣其弟廷夔收兄屍亦自投閣死一時同死者督餉  
戶部員外郎王家祿自勁死里居戶部主事張雲鶚  
不屈死指揮崔重觀自焚死傅佑與妻杜氏自縊死  
中軍劉光祐罵賊死材官李耀善射矢盡自刎死同

營李光裕趣家人死亦自刎死張天叙焚其積貯自  
縊死指揮黃廷政與弟千戶廷用百戶廷弼奮力殺  
賊全死千戶賀世魁偕妻柳氏自縊死叅將馬鳴節  
聚妻子室中自焚死里居戰死則山海副總兵楊明  
定邊副總兵張發孤山副總兵王永祚西安叅將李  
應孝在官死事則遊擊傅德藩國臣李國奇晏維新  
陳二典劉芳馨文侯國中軍楊正韓柳永年旗鼓文  
經國守備尤勉惠漸賀大雷楊以偉指揮李文焜文  
燦而副將常懷李登龍遊擊孫貴尤養鯤守備白慎  
衡李宗叙亦以守鄉土遭難諸生則陳義昌沈澹沈

演白拱極白舍章罵賊死張連元連捷李可柱胡一奎李循祥自經死一城之中婦女死義者數千人井中屍滿賊遂屠其城榆林為天下雄鎮兵最精將材最多然其地最瘠餉又最乏士常不宿飽乃慕義殉忠志不少挫無一屈身賊庭其忠烈又為天下最事聞天子嗟悼將大行褒恤以國亡不果

侯世祿榆林人由世職累官涼州副總兵遼事亟詔擢總兵官提兵赴援世祿于諸將中稱精悍為經畧熊廷弼所知及袁應泰代廷弼亦倚任之天啓元年應泰將復撫順清河議用大將十人以世祿及姜弼

梁仲善各將兵一萬主清河未行而我

大清兵拔瀋陽逼遼陽世祿弼仲善與李秉誠朱萬  
良屯兵演武場力戰仲善陣亡萬良敗奔為叢矢所  
中死弼戰尤力與世祿俱負重傷潰圍得出秉誠亦  
敗還遼陽遂破己而論罪世祿以傷重命立功自効  
尋用為固原總兵官六年以軍政拾遺罷明年寧錦  
告警有薦其才者命率家丁赴關聽調旋命出守前  
屯甫至令以故官鎮山海崇禎元年移鎮宣府明年  
冬率師入衛與

大清兵遇於順義潰再遇德勝門復潰世祿被創部

卒剽民間奔還鎮事開當重坐以傷重命戴罪立功  
已而被劾法司當大辟以勤王先至減死戍邊巡撫  
郭之琮亦削籍九年八月京師被兵率子弟從軍叙  
功免戍還籍廷臣多推薦迄不復用及賊兵臨城與  
子拱極固守新添門城陷父子兄執俱不屈死拱極  
歷官叅將常從總兵尤世祿破賊河曲有功九年冬  
任山海總兵官十二年正月我

大清兵入畿輔拱極率精騎二千躡至邯鄲遇伏敗  
負重傷尋謝病去十六年詔舉將才廷臣多推拱極  
既入都與王洪王世欽尤世威召對中左門旋遣還

卒與父同死

房之屏宛平人崇禎間由舉人為安邑知縣十六年十二月李自成盡覆陝西郡縣長驅渡河北山西以二十二日陷平陽分兵掠安邑越二日城陷之屏北向拜天子入署拜其母命妻子各自盡遂奮身入井未死賊曳出斬之全時楊家龍字惕若曲陽人由歲貢生為鄉寧知縣遭寇蹂躪民徙亡過半家龍畢力撫綏閱七年民皆復業上官交荐擢忻州知州受事數旬大寇即至召士民語之曰此城必不能守守則徒傷民命吾出若輩可全也遂挺身出城罵賊而死

士民建祠祀之賊之陷平陽也知府張璘然首迎降賊用為戶政府侍郎其陷太原也提學叅議兼僉事黎志陞亦降賊用為弘文院學士兩人皆從入京城陷京城之六日志陞入闈主試所取士即授官後南都六等定罪兩人並列首等罪當凌遲然未嘗南歸迄不能正法也璘然歸安人志陞華容人皆起家進士

趙建極河南永寧人萬曆四十七年進士授濬縣知縣清役錢築河堤修學校政稱卓異行取授戶部主事歷員外郎郎中崇禎四年出為山東副使分巡沂



州調陝西右叅政累遷山西左布政使十六年十二月李自成兵渡河東犯太原震動建極即繕修守具明年二月五日賊臨城偕巡撫蔡懋德諸監司毛文炳蘭剛中畢拱辰太原知府孫康周長史范志泰等分門守禦斃賊甚多越三日張雄守將通賊城遂陷建極危坐公堂不動賊擁至晉王府見自成迫之跪不屈欲授以官叱曰我天朝方伯復仕賊耶自成怒令曳出刑之建極下階連呼萬歲曰臣失守封疆死有餘罪自成喜以為呼已也亟令曳還問之曰若既畏死呼萬歲何為不受官建極厲聲曰我當呼當朝

皇帝寧呼賊耶遂大罵自成益怒即殺之先是賊掠  
永寧建極五子並遇害後生三子又皆夭至是趙氏  
一門盡矣拱辰字星伯掖縣人萬曆四十四年進士  
歷知鹽城朝邑二縣謫上林監丞稍遷戶部主事改  
禮部進員外郎復謫浙江按察使知事遷吉安府推  
官歷南京戶部郎中出為淮徐兵備僉事督漕侍郎  
史可法謂徐州要地而拱辰才不任治劇乃移之冀  
寧拱辰工詩嗜讀書積書至萬餘卷居官不甚理廢  
務又不善事上官故官久不達至是分守西城猶不  
廢書及被執賊適得新刀欲以人試之見拱辰方晚

視問曰若晚此何為對曰欲得此刀砍頭爾賊即取  
斬之康周字晉侯安丘人舉於鄉授遵化知縣有政  
聲擢戶部主事歷員外郎郎中出為太原知府賊既  
入猶率死士力戰俄被執賊說之降不從乃見殺志  
恭虞城人為晉府左長史署陽曲縣事分守東城城  
陷不食死

毛文炳字夢石鄭州人崇禎元年進士授壽陽知縣  
以才調掄次並有聲九年徵授吏科給事中以憂歸  
流賊來寇與有司登陴守禦城獲全服闋起故官揚  
嗣昌出督師議調州縣民兵討賊文炳言民兵可守

不可調往見驅民從軍率死鋒鏑百不一全蓋由官  
兵善避而民兵不知避官兵快馬善走而民兵不及  
走也今以大將統重兵尚不能一戰豈糾合什伯鄉  
勇遂足以辦賊哉時當大計言今天下之病莫大乎  
官方淆混上下相蒙如懲貪之明旨嚴矣而貪風何  
以不息薦章之廉吏多矣而民生何以勿寧由主計  
諸臣以奔競為有才以廉靜為無用也乞嚴勅撫按  
毋以萬姓之深讐為庶司之上考如撫按不公吏部  
得以舉發吏部不公科道得以糾彈科道不公吏部  
得以入奏庶官方肅吏治清帝並採納久之出為山

西兵偪副使駐太原十七年二月李自成大舉來犯偕  
巡撫蔡懋德叅議蘭剛中等乘城固守晝夜不懈未  
幾城陷文炳被執賊脅之降不屈誘以官不從抗罵  
數日遂為所殺妻趙氏妾李氏聞之亦投井死子兆  
夢甫數歲為賊掠去士民以忠臣子贖而歸之剛中  
陵縣人崇禎四年進士由太常博士擢南京兵科給  
事中十二年有詔起廢剛中慮起覬覦請嚴舉主以  
核實才尋奏保護留都六事曰籌度支覈軍實嚴江  
防肅保甲預儲時補大僚帝並嘉納明年劾甘肅巡  
撫劉鐸寧夏巡撫樊一蘅河南解任巡撫常道立並

冒濫京堂一衡遂罷去道立削籍其秋以漕事大壞  
陳敕獎急圖帝亦採納時山東海饑廷議救荒之策  
剛中上言曰二東不幸遭此鞠凶蚩蚩小民非不知  
為盜必死且冀苟延旦夕遂走險不顧其僅存萬一  
者不過幾家廉耻自好之良民恐死不移爾然人死  
而丁猶存田荒而賦尚在有司迫於功令拘生者以  
代死者或一人而承一戶或一戶而承一里鞭之撲  
之以責其償民不能堪益以相率而為盜否亦遠徙  
他鄉丁賦之逋欠更甚此無補於國課祇迫民以死  
亡計良左矣陛下加意臣鄉恨不能起死者而生之

獨奈何驅僅存之民置之死亡之地即日議招撫開  
墾何人願歸故鄉為今之計惟有清戶口并里甲俾  
生存者不代償死亡之賦庶幾聞風來歸荒蕪自墾  
帝納其言十六年遷山西副使兼叅議督糧儲明年  
正月涖任即遭寇分守東門時調陽和兵三千協守  
剛中慮其內應移之南關外及賊環攻陽和兵果叛  
降張雄又引賊入城遂陷剛中不屈罵賊死首既墮  
忽躍起丈餘賊皆辟易

牟孚懋字有懷霸州人崇禎四年進士授戶部主事  
進員外郎出為太原知府以廉靜得民遷兵備副使

分巡寧武諸關十七年二月李自成既陷太原遣使  
說降孕懋斬之與總兵官周遇吉嚴兵固守無何賊  
騎大至城上砲石雨下斃賊無算賊大挫更番進攻  
城迄陷孕懋不受僞命自刎死妻楊氏以投井殉之  
先是賊陷平陽知府張璘然迎降陷汾州知府侯君  
招死焉汾陽知縣劉必達袖出罵賊文被殺義勇范  
奇芳刺殺僞都尉即自刎陷代州分守叅政鹿邑閻  
夢葵不屈死至是三關皆陷賊遂長驅犯大同  
朱家仕陝西河州人崇禎元年進士歷官兵備副使  
分巡大同雅好內典政尚寬平與巡撫衛景瑗深相



得十七年三月大賊壓境有勸其出避者曰時勢至此生平叅悟何事尚惜一死不以報國乎佐景瑗城守及賊入盡驅妻妾子女入井而已從之一家死者十六人督儲郎中徐有聲山陰知縣李倬亦死之王徵俊字夢卜陽城人天啟五年進士授韓城知縣崇禎初流寇來犯督吏民禦却之坐事議調旋以大計謫歸德府炤磨巡按御史李日宣荐于朝未幾給事中呂黃鍾請用天下必不可少之人亦以徵俊為言量移滕縣知縣遷戶部主事督餉岳雲由郎中出為河南僉事有禦寇功歷山東右叅議副使以右叅

政分守寧前丁憂歸十七年二月賊陷陽城被執不屈繫之獄閩縣士民稱徵俊居鄉有德賊乃釋之既抵家北面再拜從容投環卒其時士大夫居家盡節者靈石則有宋之雋翼城則有史可觀陽曲則有朱慎鏐之雋舉進士歷官登萊監軍副使忤巡按御史謝三賓互訐於朝之雋不勝落職歸三賓亦貶秩至是遇變之雋受刑死妻喬氏詈賊撞塔死女歛尸畢亦拔簪刺喉死可觀太常少卿學遷子官文華殿中書舍人加鴻臚寺少卿城陷自縊死慎鏐晉府宗室攝靈丘郡王府事賊陷太原冠帶祀家廟驅家人入

廟中焚之火發投入焰中死同時張第元汾陽人由  
進士歷官禮科都給事中太常少卿至是家居遂降  
賊李自成敗歸山西先在京受偽職者多亡去乃用  
第元為兵政府尚書一日自成問爾家在河北無恙  
乎第元倉猝不及諱對曰衆以某為賊官屠害笑自  
成怒立殺之有耿如然者猗氏人亦由進士為兵科  
給事中被劾下獄削籍歸至是亦降賊及賊還山西  
用為刑政府尚書懼失自成指每讞獄輒予重比牛  
金星規之乃稍爭執一日自成手其奏大怒金星密  
以告夫婦對泣自經死

丁泰運字孟尚澤州人崇禎十三年進士除武陟知縣調河內著廉直聲十七年二月朔賊將劉芳亮自蒲坂渡河東窺懷慶巡按御史蘓京託言塞太行道先遁去與陝西巡撫李化熙全抵寧郭驛俄兵變化熙被傷走執京毆之褫其衣被以婦人服令裨花學婦人步稍遠輒扶之一市大笑十六日叛將陳永福自澤州引寇至京即偕亂卒迎直逼懷慶監司以下皆竄泰運獨守南城力不支被執賊擁之見若亮使之跪不屈賊燒鐵鎖炙之亦不從乃遇害賊既陷懷慶尋陷彰德安陽人尚大倫字崇雅由進士歷官刑

部郎中有國學生白夢謙以救黃道周繫獄大倫議  
寬之忤堂官意遂罷歸至是城陷抗節死又有王楫  
微由鄉舉歷官蒲州知州以強項忤豪宗謝事歸至  
是為賊所執傳詣李自成道中憤恨不食死

廬江王載 鄭簡王玄孫也居懷慶崇禎十七年二  
月賊陷其城王整冠服端坐堂上賊至被執欲屈之  
厲聲曰吾天朝藩王肯降汝逆賊耶詬罵不屈遂遇  
害賊執其長子朔擲擁之北上三月過定興于旅店  
作絕命詞遂不食卒於途

何復字見元平度人邵宗玄字景康碭山人復舉崇

積七年進士授高縣知縣有却賊功忤上官被劾罪  
至謫戍後廷臣多論荐十五年秋起英山知縣入為  
工部主事進員外郎十七年二月擢保定知府宗玄  
由恩貢生歷保定府同知有治行時李自成陷山西  
遣其制將軍劉芳亮由固關東犯畿輔震動及真定  
游擊謝嘉福殺巡撫徐標反遣使迎賊人情益洶洶  
宗玄時攝府事亟集通判王宗周推官許曰可清苑  
知縣朱允康指揮劉忠嗣及里居縉紳張羅彥尹洗  
等議城守復聞之兼程而馳或以寇迫止之不顧既  
入城宗玄即授以印復曰我初至諸務未暗公部署

已定印仍佩之我與僇力可也乃謁文廟與諸生講  
見危致命章詞氣激烈講畢即登城分門而守有賊  
騎潛過城外詭稱棄城伯偵卒無敢詰者三月十九  
日都城陷明日薄暮賊遣使投書誘降宗玄手裂之  
益戒嚴又明日寇大至絡繹三百里聲撼山谷有教  
十騎逼河干服婦人遙呼連降歷數所過百餘城皆  
開門遠近無抗拒者不降即齏粉且曰京師已破若  
等為誰守城上人聞之髮豎皆裂守益堅寇四面環  
攻雲梯如牆而建且攻且罵既激守者怒而出戰則  
乘勢突入宗玄等知其謀固守不出城中巷皆樹柵

民無老穉悉持挺伺擊道上非持符者不敢行賊知  
守禦堅稍稍引却會督師大學士李建泰率殘卒數  
百人輦餉銀十餘輜叩城求入宗玄等不許建泰恚  
大呼我朝廷重臣討賊至此安得不納舉所携勅印  
示之宗玄等曰荷天子厚恩御門賜劍酌酒餞別今  
不伏鉞西征乃叩閤避賊耶建泰怒厲聲叱責呼益  
急欲舉尚方劍恐之衆中有欲啓門者宗玄曰倘賊  
詐為之若何或言金御史毓峒監督師軍當識之亟  
推毓峒出視信乃納之建泰入而賊攻益厲掘城西  
南隅守者以火罐擲之不敢近驅難民哭城下異亂



衆心城上擊以礮石亦却去建泰乃倡言曰勢不支  
矣姑與議降得一印信文牒可矣出一帋迫宗玄用  
印宗玄憤抵印坐隅厲聲曰我爲朝廷守此一塊土  
義不降賊欲降者任爲之大哭引刀將自刎左右急  
止之皆兩泣羅彥趨而前曰那說勿聽連擊賊于是  
砲復雷震復自起熱西洋巨砲火發被燎幾死賊意  
在必克攻擊無遺力雉堞盡傾彈丸若雨城中皆負  
板而走二十四日賊火箭中城西北樓樓焚復焚死  
俄南郭門又火守者多散寇復誘南城守將王登州  
縋城出降寇一擁而上建泰中軍副將郭中杰等爲

內應城遂陷宗玄及中官方正化不屈死建泰即率  
曰可允康出降是日去都城之陷已五日矣正化山  
東人初為司禮太監十五年冬畿輔被兵命總監保  
定軍務有全城功已而撤還十七年二月復命出鎮  
正化頓首辭帝不許復頓首曰奴此行萬無能為不  
過一死報主恩耳帝亦垂涕遣之既至宗玄等劄置  
已定正化一無所更即日登陴共守有請事者但曰  
我方寸已亂諸公好為之可也及城陷擊殺數十人  
賊問若為誰厲聲曰我總監方公也賊攢刀斫殺之  
其侍從諸奄皆死

張羅俊字元美保定清苑人父純臣由武進士歷官  
署都督僉事神機營左副將生六子長羅俊次羅彥  
羅士羅善羅詰羅輔羅俊雅敦義行娶瞿女終身不  
置妾羅彥字仲美舉崇禎二年進士授行人擢吏部  
稽勲主事累遷文選郎中執政楊嗣昌數借討疆事  
薦用匪人羅彥多為駁正進士謁選有直奔堂上奪  
簽自擇善地者羅彥疏論之有詔議罪帝時疑吏部  
行私駁之特嚴廠衛邏卒常充滿其庭秉銓者多罹  
重譴羅彥獨無所汙染秩滿獲遷光祿少卿及京察  
前是進士被劾者其同榜多居言路為之修隙乃鐫

其一官未幾同邑太僕少卿史堃坐贓瘕死忌羅彥  
者誣其庇堃有所私遂落職羅彥既歸羅俊始以十  
六年秋舉進士羅輔亦以是年舉武進士兄弟並需  
次還籍十七年二月聞賊漸逼保定遂議城守初羅  
彥少時嘗從父塞上習知兵事及官行人奉使旋里  
適鄉郡被兵佐當事守禦有功後三被兵皆值里居  
全城著績最後城守時給事中時敏奉命過其地夜  
半叩城門欲入羅彥不許敏怒劾其擅司鎖鑰羅彥  
援邳惲事疏辨帝不問及是兄弟倡義捍城與同知  
邵宗玄等歃血盟誓總兵官馬岱謁羅彥于家曰賊

今分兩道來一出固關一趨河間吾當出屯蠡縣扼其衝先殺妻子而後往其城守悉屬公羅彥曰諾詰旦岱果殺其妻孥十一人率師去羅彥等糾集鄉兵得二千人分陣列守羅俊守東城羅彥西北羅輔往來策應守禦甚固公廩不足出私廩佐之賊遣騎呼降羅俊顧其下屬聲曰苟欲降者取我首去劉忠嗣挺劍曰有不從張氏兄弟死守者齒此劍怒目髮上指聞者咸憤守益堅賊為引却已聞京師陷天子殉社稷衆皆哭北向拜又羅拜重訂盟誓而賊攻圍益急城中異議亦間出羅彥謂宗玄曰小民無知非鼓

以大義氣不壯乃下令人緹崇禎錢一于項以示戴  
主之意于是忠憤大作又思致死賊謂羅彥主謀據  
城不下呼其名繞城大詬且射書說降羅彥不顧死  
弟傾貲犒士士為盡力賊死傷無算攻愈力無何李  
建泰親軍內應城陷羅俊猶持刀砍賊刀脫兩手抱  
賊齒其耳血淋漓口吻間賊至益衆大呼我進士張  
羅俊也遂遇害羅彥見賊入急還家大書官階姓名  
于壁投環死子晉與羅俊子坤並赴井死羅善字舜  
卿為諸生佐兩兄城守城將陷兩兄戒勿死羅善曰  
有死節之臣不可無死節之士妻高氏携三女先投

井死羅善亦投他井死羅輔好武畧多力善射晝夜  
乘城射必命中城既破欲會羅俊奪圍走羅俊不可  
羅輔連射殺數人矢盡持短兵奮擊又殺數人乃死  
張氏兄弟六人羅士早卒其妻高氏守節十七年至  
是自經死惟羅詰從水門出獲存其妻王氏亦縊死  
一時同死者羅俊伯母李氏罵賊死羅彦妻趙氏妾  
宋氏錢氏及子晉妻師氏當城圍急時並坐井旁以  
待比賊入遂先羅彦投井死獨趙氏不沉家人出之  
再投又不沉乃免羅輔妻白氏在母家聞變欲死侍  
者勸止之給以汲井推幼女先入而已從之羅俊再

從子震妻徐氏與妻劉氏亦投井死張氏一門死者  
凡二十三人

金毓峒字穉鶴保定衛人父銓由進士歷官戶部員  
外郎毓峒舉於鄉積二十年始成進士授中書舍人  
崇禎十四年面陳漕務稱旨特授御史故事有司徵  
賦必造赤歷冊俾民易知至是盡廢官吏得緣為奸  
毓峒請復舊尋論兵部尚書陳新甲庸才誤國戶部  
尚書李待問積病妨賢十二月又請渙發德音自十  
五年為始蠲除繁苛與海內更新因言復社一案其  
人盡出於純擬其事多涉於詞章不可以一夫之私



怨開此禍端乞愛惜人才培養士氣帝多採納明年  
出按陝西承兵荒之後諭屬吏加意拯恤秦人賴之  
雲棧七百餘里悉盜藪為建堡立驛設官分戍行旅  
無虞時孫傳庭治兵關中吏民苦其征繕日夜望出  
關天子亦屢詔督趣毓峒獨謂將驕卒悍未可輕戰  
抗疏爭之帝不納師果覆敗十六年冬毓峒期滿得  
代甫出境而賊入關復還至朝邑覈上將吏功罪而  
後行明年二月召對命賜食往監李建泰軍馳赴山  
西甫抵保定而賊騎已逼遂偕邵宗彥張羅彥等共  
守毓峒分守西城散家貲千餘金犒士其妻王氏亦

出簪珥繫帶佐之及聞京師變賊又射書說降衆頗  
有憚志毓峒厲聲曰果爾正當為君父復讐敢異議  
者斬懸銀牌令擊賊者自取衆爭奮斃賊多其從子  
振孫有勇力以武舉人佐城守及城陷衆皆散獨立  
城頭大呼曰我金振孫前日殺數賊魁者我也賊群  
至走解之有一賊挽毓峒往謁其帥毓峒且罵且行  
行過一井努力推賊仆地投井死妻聞之卽自經有  
陳氏者振孫元肖孫媳也與侍兒挂春亦投井死肖  
孫以匿毓峒二子為賊擄掠體無完膚終不言二孤  
獲免同時守城殉難者前邠州知州韓東明武進士

陳國政赴井死前平涼府通判張維綱舉人張爾輩  
孫從範不屈死舉人高經負母避難遇賊求釋母母  
獲釋而經被執給以至家取資賊防稍疎乘間赴水  
死貢生郭鳴世方寢疾聞城陷整衣端坐賊至持棒  
奮擊遇害諸生王之珽先城陷一日置酒會家人語  
以死難歡飲達旦城破偕妻齊氏及三子二女入井  
死其餘諸生韓楓何一中杜日芳王法等二十九人  
布衣劉宗向田仰名劉自重等二十人或自經或自  
溺或受刃皆不屈於賊而婦女盡節者乃至一百十  
五人海內聞而異之他若都給事中尹洗舉人劉會

昌貢生王聯芳以城陷之次日為賊搜獲亦不屈死  
賊揭其首於竿書曰據城抗師惡官逆子見者為飲  
泣

劉忠嗣保定後衛指揮同知也性忠勇為儕輩所服  
崇禎十七年二月寇犯南京忠嗣時掌衛事分守東  
城既被圍拒擊甚力城將陷召女弟適揚千戶者歸  
舍與妻毛氏媳王氏全處一室俱以弓絃勒殺之後  
登城拒守城破被執忠嗣怒詈奪賊刀砍殺二賊賊  
脅至剜目割鼻夫解死一時武臣死事者守備則張  
大同興寧之坦力戰死指揮則文運昌劉洪恩戴世

爵劉元靖呂九章呂一炤李一廣中軍則楊儒秀鎮撫則管民治千戶則楊仁政李尚忠紀勳趙世貴劉本源侯繼先張守道百戶則劉朝卿劉悅田守正王好善強忠武王爾祉把總則郝國忠申錫皆殉城死有呂應蛟者保定右衛人歷官密雲副總兵謝事歸寇至總監方正化知其能延與共守應蛟獎率士卒晝夜戮力城破猶持短兵格鬪殺十餘賊而死又有賀東鉞者大寧左衛人長身多力精騎射崇禎四年應武科為一甲第三人歷官天津叅將十五年父沒於狼山扶柩至臨清遇賊破巷戰終日矢盡被執不

屈死人稱忠孝武臣

王行儉字質行宜興人崇禎十年進士除南京刑部  
主事進員外郎出為重慶知府時蜀地多寇重慶常  
宿重兵行儉撫馭有方民獲安業十七年正月張獻  
忠陷夔州以六月犯重慶行儉及巴縣知縣王錫佐  
巡撫陳士奇乘城固守越數日城陷行儉被執為賊  
鬻割而死錫新建人崇禎十三年進士除巴縣知縣  
時重慶數用兵而巴其附郭縣也號難理錫夙夜勤  
事不懈土寇彭長庚起長壽隣水間殺典史為亂巴  
與接壤錫督義勇殲其魁衆遁去推黃賊來犯力戰

却之馘其渠馬超至是賊攻圍急蒙巨板穴城錫灌以熱油多死及被執厲聲大罵賊怒抉去其齒仍罵不已賊捶其膝抑使跪終不屈明日昇至教場罵盡厲賊縛樹上射之天鬻而烙之旣死復燬其骨令無可歸葬視一時同死者彼為尤烈云

張繼孟字伯功扶風人萬曆末舉進士除濰縣知縣天啓三年擢南京御史未出都奏籌遼六事因言臣作令著績累薦章祇緣入都踈節遂遠擲南臺當此錢神世界公道無權宜嚴禁饋遺帝令指寔繼孟以風聞對于是吏部尚書張問達及吏科河南道各

具疏自明詔停繼孟俸半載左都御史趙南星上言  
治天下宜調劑人情不使偏重今天下亦太偏矣進  
士之官重而舉貢輕京朝之官重而外官輕在北之  
科道重而南京輕甚則科重而道輕長奔競之風銷  
正直之氣有識者所共嘆也乞因繼孟之言思偏重  
之弊勅下吏部極力挽回于用人之道不為無補帝  
深然之尋陳江防八要多議行以不建魏忠賢祠斥  
為東林邪黨削奪歸崇禎二年起故官上言近見冢  
臣王永光人言踵至一疏語語謬戾敢平心駁之其  
曰惠世揚等借題當議夫所云借者無其事而借其



名云也世揚與楊漣左光斗同事同心但未同死耳  
今楊左業有定議世揚方招揭於天下後世奈何以  
借名之謬一又曰高捷史莖發奸已驗特用宜先夫  
捷莖之糾劉鴻訓也為楊維垣等報讐耳鴻訓輔政  
止此一事快人意其後之獲罪以納賄非以捷莖之  
叅論也今指獲奸者為發奸謬二又曰諸臣所擁戴  
者錢謙益李騰芳孫慎行夫謙益本末陛下近亦洞  
然至騰芳慎行之品才亦天下共相推服者會推之  
時永光身主其議乃指公論為擁戴謬三且曰欲諸  
臣疎一面之網息天下朋黨之局信斯言也則部擬

漏張文熙等數十人是為疎一面之網而陛下之  
核議罪者反為朋黨之局乎謬四且永光先為御史  
李應昇所糾今又為御史馬孟禎徐尚勳吳姓等所  
論而推轂永光者先為崔呈秀徐大化今則霍維華  
楊維垣張文熙其為人之賢不肖可知矣後又劾南  
京兵部尚書胡應台列其貪汙教事帝並不納而永  
光渠疾之出為廣西知府廣西遠惡地從無甲榜任  
者繼孟至值土酋普名聲久亂未靖繼孟設計醢殺  
之一方遂安士民為立祠奉祀稍遷浙江鹽運使加  
右叅政以忤視鹽內官崔璘左遷保寧知府尋進副

使巡川西十七年八月張獻忠寇成都與同官陳其  
赤陳孔教蜀府長史鄭安民同知方堯相等佐巡撫  
龍文光協力拒守既而城陷皆被執幽之僧寺時獻  
忠僭帝號欲用諸人脩百官而繼孟等不為屈乃被  
殺妻賈氏亦從死其赤字石父崇仁人崇禎九年進  
士歷衢州推官西安知府有吏能遷兵脩副使轄成  
都及城陷投百花潭死家人同死者四十餘人孔教  
字魯生會稽人舉於鄉歷官四川按察僉事至是不  
屈死子以衡奉母孔氏南竄孔教死匿不令知踰年  
母詣以衡書室見副使周夢尹請孔教卹典疏哀號

墮地罵以謝曰父死已二載我尚偷生不肖子使我  
無顏見汝父地下遂取刀斷喉死安民浙江人由貢  
生歷蜀府左長史賊圍成都安民分守南城城陷全  
節死堯相字紹虞黃岡人歷官成都府同知監紀軍  
事兵食不足偕御史劉之勃請於蜀王王不允共投  
於池以救免次日城陷殺於萬里橋

劉士斗字瞻甫南海人崇禎四年進士授太倉知州  
與州人張采張溥祗礪名節有政聲以忤推官周之  
夔大計請江西按察司知事擢成都府推官攝府事  
緝輯諸勞御史劉之勃薦為建昌兵備僉事賊將入

境迫勅促之行士斗曰安危生死與公共之復何往  
被執見之勅與張獻忠語大呼曰此賊也公不可少  
屈獻忠怒提之上士斗曰反顧之勅語如前閨門被  
難同時沈雲祚字子凌太倉人崇禎十三年進士除  
華陽知縣有秦纘勳者與華陽奸民為搆黃賊十三  
家耳目既被擒復與其黨數十人殺獄吏逸去雲祚  
設策捕斬之賊破夔門成都大震雲祚走謁蜀王陳  
守禦策不聽聞內江王至涿賢往說之曰今成都危  
在旦夕而王府貨財山積不及今捐之募士殺賊一  
旦疆場淪喪誰為守此貨財者至涿言于王亦不聽

及賊迫成都王始出財佐軍已無及城旣陷獻忠欲  
屈諸人用之幽之大慈寺而遣其黨饋食且以白刃  
脅降雲祚不屈遂遇害成都知縣吳繼善亦太倉人  
由進士起家旣被執賊用為禮部尚書令草郊天文  
文成獻忠視其紙有接續處大怒磔殺之

王勵精蒲城人崇禎中由選貢生授廣西府通判為  
人仁慈善折獄歲凶粟貴人皆閉糴勵精毀所繫銀  
幣易粟減價糶富人聞之爭出粟價遂平遷崇慶知  
州亦多善政十七年張獻忠陷成都州人驚竄其家  
人勸之去勵精不可具朝服望北拜又西向拜父母

從容操筆書文文山成仁取義四語壁上遂登樓縛  
利刃于柱而置火藥樓下危坐以俟俄報賊騎渡江  
即命舉火火發觸刃貫胸而死賊嘆其忠歟而葬之  
其墨蹟久而猶新或刮滌之終不磨滅後二十餘年  
州人建祠奉祀祀甫畢壁即頽圯者嘆異先是十三  
年賊犯仁壽知縣郤陽劉三策誓衆拒守及城陷不  
屈而死贈尚寶司丞及是賊陷郾縣主簿山陰趙嘉  
熈守都江堰賊誘之降不從投江死陷綿竹典史卜  
大經與其僕繼死他若榮縣知縣漢陽秦民湯滿江  
知縣江夏朱蘊羅興文知縣漢川艾吾陽南部知縣

鄭夢眉中江教諭攝劍州事單之賓皆以城破殉難  
夢眉夫婦並縊蘊羅吾弔至閬家被難而彭縣知縣  
王國麟乃爲賊戶部尚書又有邛州知州王國臣素  
與賊通僉事胡恒駐邛州廉得其狀數譙讓之國臣  
憾甚至是恒攝建昌兵備事國臣即刼其孥送猷忠  
據城以叛會雅州諸生傅元修說天全土官高躋泰  
出兵襲擊國臣敗走成都躋泰遂迎恒入邛未幾國  
臣爲賊巡鹽御史與賊將艾能奇率兵數萬至雅州  
脅躋泰猷恒及宗室朱奉錚等數人又取躋泰弟登  
泰說言授官携至成都盡殺之其兇逆如此奉錚蜀



府宗室舉進士歷官御史教有建白其崇廉恥責輔  
臣劾督師丁啓睿諸疏為時所稱至是里居遂及于  
難

尹伸字子求宜甌人萬曆二十六年進士授承天府  
推官累遷南京兵部郎中外為西安知府歷陝西提  
學副使蘓松兵備叅政居官公廉強直不事嬖阿凡  
三任皆投劾去天啓時起故官分守貴州威清道時  
貴陽圍初解巡撫王三善將深入大方伸頗贊之監  
軍西征每戰輒勝三善過信奸人陳其愚事與之謀  
伸亦信之不疑及中軍王建中敗沒三善不知伸知

而不告致墮其愚計三善亦敗沒伸哭圍得歸坐是  
奪官戴罪辦賊四年七月賊圍普安伸督兵救之賊  
解去伸遂移駐其地十一月賊復來攻率叅將范邦  
雄破走之遂偕諸軍逐北至三岔河督師蔡復一上  
其功請免戴罪敗一秩視事從之歷湖廣按察使左  
布政使崇禎五年被諭調河南右布政使以失禦流  
賊罷歸伸性寡合有觸必發所至與長史迕而待人  
有始終篤于分義工詩善書日課楷書五百字寒暑  
不輟張獻忠陷叙州避之山中賊遣人搜得之罵不  
肯行賊重其名必欲生致成都至井研罵益厲賊攢

殺之南渡時起伸太常卿伸已先死同時在籍死難者成都則雲南按察使莊祖誥廣元則戶科左給事中吳守英賓縣則工部主事蔡如蕙聊縣則舉人江騰龍而安岳進士王起義渠縣禮部員外郎李含乙皆舉義兵討賊不克死他若綿州嚴錫命彭縣龔完敬並進士發身而為賊用錫命為吏部尚書完敬兵部尚書未幾以宮室不治為賊殺死士論醜之

張允登漢州人萬曆三十八年進士除咸陽知縣調咸寧並有惠政稍遷刑部主事進員外郎郎中泰昌時出為嚴州知府持身清苦吏民畏若神明會台州

兵變上官以允登才奏調之為巡鹽御史傅宗龍所  
罷天啓三年宗龍自請討雲貴叛賊稱允登沉毅可  
令監軍部議將從之以宗龍病歸不果用其冬遷雲  
南提學副使五年大計拾遺為言官所中調貴州僉  
事督屯田鼓鑄蕪穀軍馬錢穀破水西賊有功遷廣  
右叅政進副使以疾歸崇禎四年正月起陝西右叅  
政分守河西道時延綏頻歲大饑羣盜四起允登賑  
荒恤災詰奸弭盜威惠並著御史吳彥芳陝西巡按  
御史吳桂並薦之初賊上天猴混天猴乞降總督楊  
鶴處之鄜州其年閏十一月偵知甘泉有餉銀十萬

糾其黨千餘人猝來攻城允登時在城中與知縣郭永圖並登城守禦衆寡不敵城遂陷允登求圖並遇害事聞贈允登太常卿永圖光祿少卿並賜祭葬歷其一子永圖絳縣人起家鄉舉全時郭應響福清人萬曆三十四年舉鄉試第一崇禎初歷戶部員外郎督固原甘肅軍餉嘗採戚繼光紀效新書練兵實紀為兵法要畧與所製炮車進之朝當事謂其知兵四年九月擢榆林兵備僉事及允登沒應響兼領其職明年二月賊混天猴等犯鄜州應響出禦墜馬被殺亦贈卹如制

呂維祺字介孺新安人祖母牛氏以守節獲旌父孔  
學事母盡孝晚年捐粟千二百石賑饑兩旌孝義維  
祺舉萬曆四十一年進士授兗州府推官清獄救荒  
大興文教以治行高擢吏部稽勲主事更歷四司至  
文選先宗崩皇長子未踐阼內侍專幸南城維祺適  
謁見慈慶宮抗言梓宮在殯乘輿不得輕動乃止退  
陳保護聖躬言起居宜慎飲食且節左右不得嬉笑  
于前侍御不得襍運于側問誰防閑此閣部大臣之  
責宜于宮門近地更番入直偕臺諫諸臣朝夕問慰  
開其心而定其志殿下亦不時宣召面商大政而親

近內臣急擇老成忠謹者四五人以姓名達之中外  
俾責有所歸而毋使干預政事蓋防者不于著而于  
微願陛下速登大寶慎加調護乘與毋妄移一步女  
侍毋襍進一人雖小事必由外廷即頻笑不以輕假  
此微臣今日所惓惓致懇者也因請罪崔文昇李可  
灼連李選侍移宮報聞天啓初歷考功文選員外郎  
進驗封郎中乞假歸四年推考功郎中魏忠賢惡其  
異已不用開封建忠賢生祠移書諸紳戒勿預忠賢  
毀天下書院維祺立芝泉講會祀伊洛七賢講論不  
輟崇禎元年起尚寶卿遷太常少卿督四裔館明年

四月因廷議軍餉奏陳十五事更陳行鈔之利惟鈔  
法議格十月陳防微八事言陛下初何嘗不動批荅  
近始有留中者留中多則疑慮起恐官府有睽隔之  
形此當防者一初何嘗不虛懷商確惟擬旨不當乃  
改擬徑行其中固有當執奏者明主可與忠言安得  
盡廢匡救此當防者二初何嘗有心疑厭其可疑可  
厭者皆臣工自取乃扶同之惡既深偏黨之說復起  
將立黃互爭共獲並進此當防者三初何嘗不日御  
講筵近始有傳免者豈以君德成就無閑啓沃乎此  
當防者四初何嘗不寡嗜欲慎晏游近日得無偶涉



臣固知傳聞未必盡實但養德養身不可不察此當防者五初何嘗不慎刑獄今間有下詔獄者且登聞鼓擊恐長罵訟之風禁地濺血或教輕生之實此當防者六初何嘗不重廷推今間有用陪者雖簡拔原出上裁而用陪終非常典此當防者七初何嘗不樂諫言今雷霆時震思效寒蟬將來或有大奸慝大利害誰復冒死廷爭乎此當防者八俄陳純聖學茂聖德熙聖治三事言陛下聖學未嘗不純然學不如堯舜非純也書云人心惟危道心惟微試思何者為人心為道心不但美色當遠淫聲當絕御宦官宮妾當

嚴卽喜怒有所偏意念有所執亦皆人心願時醒此  
心嘗與賢士大夫講論以涵養性情消融意見則陛  
下之學一堯舜之學矣聖德未嘗不茂然德不如堯  
舜非茂也堯舜雖欽明濬哲猶必詢事考言達聰明  
目陛下天縱聖神群臣莫及然愚者不有千慮之得  
聖人不採狂夫之言乎惟舍己從人尤見聖心之無  
我則陛下之德一堯舜之德矣聖治未嘗不熙然治  
不如堯舜非熙也堯舜之治惟以二十二人亮天工  
是為急先務急親賢今陛下急于求治留意富強欲  
事事綜核人人督責如理勢絲愈急急愈結何不以擔

當責政府以廢務責六曹以封疆責督撫加意親賢  
專心先務所謂任一人足領袖千萬人行一事足包  
函千萬事而陛下之治一堯舜之治矣末責脩大小  
臣工甚至並優旨報之三年三月由太常卿擢南京  
戶部右侍郎總督糧儲馳陳䟽道中所見民生憔悴  
及倉庾空匱狀帝命核致匱之由因言北部借支折  
色九十三萬兩有奇貴州及漕運借支本色二百五  
十一萬石有奇是以甚匱維祺乃設會計簿曉夜鈎  
考得外郡隱沒黠吏侵欺及積逋不輸者各數十百  
萬大者彈奏小者捕治又立法嚴督屯課倉庾遂裕

十月疏言今天下大可憂者非止一端而財用不足為最甚夫不足而止求之于財用此所以愈不足也孟子曰無政事則財用不足不從政事清其源卽日言加派搜括何濟於事今人情喜寬而苦嚴出入之數溷而難稽欽奉之條寢而不報題覆無專司會計無專職諸司之事襍出不經在外之差趨避惟意可謂有政事乎臣有六議於此稽出入以杜侵漁增比較以完積案設本科以重題覆時會計以覈支收定差序以杜營私禁差假以修職業帝稱善即行之主事陳所養督賦湖廣高卧家園不赴維祺劾而罪之

由是人知奉職四年冬遣中官出鎮維祺抗疏切諫  
並責閣臣不能匡正詞甚鯁直明年極陳蕪湖設閘之  
害請停罷不從六年四月拜南京兵部尚書叅贊機  
務恤軍士禁饋遺勤操練清冒軍八千餘名察奸吏  
侵盜餉金置之法軍政修舉八年正月流寇犯江北  
遣叅將薛邦臣防全椒趙世臣戍浦口無何世臣潰走  
南京震動鳳陽旋告陷會大計拾遺兩京言官交章  
劾奏詔解任南京言官復劾其他事遂除名維祺雅  
嗜正學初聞先達孟化鯉風私淑之在兗州及南都  
皆集諸生講學從遊者甚衆至是寓居洛陽立伊洛

會以迪後進及門者二百餘人十二年河洛大饑盡  
出私廩賑濟詔復其官生平篤好孝經嘗撰本義二  
卷大全二十八卷或問三卷廣引經史大闡其義書  
成有芝十八莖生于庭適如其章數聞者異之其年  
表上之朝十四年正月李自成大舉來寇維祺分守  
北城會總兵王紹禹親軍內應城陷維祺被執詬罵  
求速死乃北向拜君西向拜父母延頸就刃年五十  
有五贈太子少保祭葬廕子如制南渡時加贈太傅  
謚忠節弟維結字泰孺由選貢生為樂平知縣解職  
歸十六年寇陷新安亦抗節死贈按察僉事

賀逢聖字克繇江夏人其父有學行逢聖繼其緒早有俊聲舉于鄉以家貧為應城教諭學益有聞萬曆四十四年由殿試第二人授翰林編修淡泊明志不異寒士天啓時歷中允司業洗馬魏忠賢重其名特詰之言諸方並建生祠獨貴鄉湖廣無功德逢聖曰此地方有司事予安知忠賢曰聞上梁文即公手筆何云不知逢聖曰此借銜陋習耳予待罪經筵安能數千里外為人作文忠賢拂然去會所司題南閣與試遂誣以營求削其籍未幾莊烈帝登極起故官崇禎元年遷南京國子祭酒入為少詹事尋遭外艱廬

墓三載還朝進詹事拜禮部右侍郎六年改吏部進  
左侍郎尋擢禮部尚書協理詹事府九年六月以本  
官兼東閣大學士與孔貞運黃士俊入閣輔政十月  
加太子太保改文淵閣時溫體仁為首輔張至發次  
之明年六月體仁謝政至發為首輔逢聖與之協志  
給事中丁允元劾其輔政無能懷奸有據汪應龍宵  
人也力為推舉高攀龍左光斗業蒙聖鑒反加詆斥  
顛倒如此何以輔治帝切責之至發之訐黃道周與  
東林構也逢聖為屬草以故時論不甚附之十一年  
致政歸歷陳道中所見災傷及郵傳困敝狀帝優旨  
報焉十三年遣使存問明年四月帝思用舊人與周



延儒同召屢辭不允命所在有司設促延儒氣焰烜赫縉紳奔赴舳舻啣尾不絕逢聖以輕舟隨其後寂無人知及還朝帝所以待之者遠不如延儒逢聖醇謹守位而已十五年正月朔旦帝行尊師禮揖輔臣於皇極殿逢聖位居次亦與焉時國事已不可為乃屢疏引疾至六月始得請帝將增置閣臣召延儒逢聖等入德政殿賜坐逢聖以帝允其去前致謝忽大哭不止已而駕移中極殿諸輔臣隨入賜宴逢聖復大哭拜跪十數不已帝命之出至檻外行辭朝禮又

絮哭不自勝竟無所語衆咸怪之詔賜道里費彩幣  
鱗衣遣行人護歸顏行䟽謝因救尚書李日宣等帝  
報曰卿克抒蓋忱彌見忠愛朕當書諸座右十六年  
六月張獻忠逼武昌城中人多謀遁走逢聖言于當  
事力禁之及賊圍城逢聖晨夕登陴與士卒同饑困  
力不支城陷逢聖亟詣楚王府邀王同死王已不知  
所在逢聖遂為賊所執叱之曰我朝廷大臣若輩不  
得無禮賊推之使去乃北向五拜三稽首投墮子湖  
死妻危氏子覲明媳曾氏陳氏孫三人皆從死次子  
光明自他所來赴亦死之事定有司覓其屍閏八月  
而顏色不變南渡時贈少傅謚文忠祭葬蔭子如葵

典逢聖苦節自甘束修砥行朝野皆重其為人其學  
多得之于靜以一念不起為極熹宗初卧病乞假不  
許時潦倒床褥間其門生候之曰先生一念不起終  
恐一事無成逢聖笑而頷之故雖致位政府而謨烈  
無聞惟晚節一死為得其正命云同時傅克字元甫  
進賢人祖烟南京刑部尚書冠以天啟二年舉進士  
第二授翰林編修崇禎中歷侍讀中允諭德祭酒少  
詹事擢禮部右侍郎協理詹事府嘗陳保元氣辨人  
才正紀綱信詔令四事優旨褒納十年八月拜禮部

尚書兼東閣大學士與劉宇亮薛國觀全入閣明年  
八月有章奏發自御前者冠以為外來揭帖援筆直  
判其上既知悞皇恐引罪帝即放歸冠家世素封性  
豪侈居第宏麗多畜婢妾好長夜之飲日過午乃能  
出肅容後鄉邦被兵乃走入福建事隆武以原官督  
師恢復江西已而事敗寓居門人泰寧汪亨龍家亨  
龍懼為已累執獻有司不屈遇害於汀州  
鹿善繼字伯順定興人祖久徵萬曆中舉進士授息  
縣知縣時詔天下度田各署上中下環息獨以下田  
報上官屢却之久徵曰度田以紓民乃病民乎執如

初故額田二萬八千頃至是占隱畢出溢田四千餘  
頃則以是賦均派之闔邑稱利毋服闋起官襄垣先  
是歲旱荒民多流徙所司不時報以逋賦責現戶民  
不堪久徵按籍除懸額七百戶民獲蘓而流亡復業  
以治行高擢御史出按蘓松諸府列息乃訟禁火化  
等十六事歲行之俗為稍變二十四年還朝值帝以  
軍政事貶黜言官三十四人久徵抗疏申救亦謫澤  
州判官父之遷榮澤知縣未任卒父正個儻負奇能  
急人患難至傾家捐身命不恤遠近高其義稱為鹿  
太公善繼端方謹愨少讀王守仁傳習錄慨然有必

為聖賢之志鄙章句薄溫飽不與俗浮沉舉萬曆四十一年進士授戶部主事以內艱歸服除起故官時遼左方用兵餉中絕廷臣數請發帑不報廣東適進金花銀善繼言於尚書李汝華曰與其請不發之帑何如留未進之金如干上怒願以身任汝華如其言疏請帝怒奪善繼俸一年令補進善繼持不可廷謝日奄人閹扉令馳書問太倉庫此銀安在筦庫主事劉榮嗣報曰發三日矣實未發也奄人傳旨速補善繼曰有可還安用借請以善繼言回奏死生惟命奄愕貽去乃奪汝華俸二月善繼降一級調外言官交

章請留不報而銀竟補還泰昌改元復原官典新餉盡斥諸耗羨陋規時外鮮多不至歎曰餉不以時士安得飽然餉派於民民窮又安能應抗疏請發帑百萬不報再疏又不報天啓元年遼陽陷以才改兵部職方主事與同官耿如杞葉震生為尚書崔景榮草疏請罪且逮治行間遇將御史游士任馬逢臯有所庇疏刺之詆三人為小臣善繼憤抗疏曰臣等固小臣御史獨大臣乎二百年來御史氣焰橫絕朝端而考時論事曹郎昌言常居其半人各有品不可輕也疏上即日出署帝不許逢臯復有詒言善繼報之曰

天下不能爭者威焰不可奪者是非不敢避者艱危不可喪者廉耻行矣御史好為之是時言路勢張郎官不敢忤視善繼獨與抵抗如此尚書王象乾行邊荐用廢將數人即中如杞不為覆象乾志疏論之首輔葉向高擬旨責如杞違阻如杞即引疾善繼上書向高曰違疆之壞由於債帥中外諸要人入其債而干請于職方職方自愛其官不得不徇其請今幸得一憂國奉公不徇情面之人反以違阻罪之將胥天下以職方為市永無不債之帥者自此一言始勿謂能違阻之郎官易得勿謂去違阻之郎官為小失也



向高者善繼座主也得書甚愠已心折其言事竟寢  
高攀龍薦善繼剛毅肯任事請以職方兼御史督革  
下保甲教民忠義得旨允行竟不果內閣孫承宗理  
兵部事推心任之及閱視關門以善繼從出督師復  
表為贊畫時議欲調善繼于吏部力辭不就至關杜  
饋遺絕宴會布衣羸馬出入亭障間廷見將卒與相  
勞苦因以勾稽行伍審察營壘鼓勇敢恤饑寒士心  
悅附承宗倚之若左右手其拓地四百里收復數十  
城堡善繼籌畫為多承宗嘗曰伯順在坐使人非幾  
盡杜儼若嚴師助我不止謀議也在關四年累進員

外郎郎中及承宗謝事善繼亦移疾歸崇禎元年起  
尚寶卿遷太常少卿管光祿丞事甫三載復請告歸善  
繼先後家食率與門人講學從遊者日衆九年七月  
大兵攻定興善繼時居江村長吏請入城共守親故  
交阻之不聽固守六日城破不屈死家人奔告其父  
父慨然曰吾兒素以身許國今何憾事聞贈大理卿  
謚忠節勅有司建祠子化麟舉天啓元年鄉試第一  
伏闕訟父忠踰年亦卒孫盡心舉崇禎九年鄉試全  
縣薛一鶚字百當性豪邁不羣聞人間不平事輒攘  
臂而起雖重忤長吏不恤由貢生為黃州府通判荆

王姬素妬誣他姬酖世子一鶚白其誣奄人傳太妃命欲竟其獄卒直之遷蘭州知州州北有田設于番吏汎其賦于他戶其後田復歸為衛卒所據民賠賦如故積三十年一鶚履畝清核竟除其害至是佐善繼城守遂與全死

張可大字觀甫應天人世襲南京羽林左衛千戶舉萬曆二十九年武進士授建昌守備遷浙江都司僉書分守瓜州儀真捕江洋盜每發輒得稅監魯保死淮撫李三才令可大錄其貲却保家重賄同事者欺可大獨獲薦葉向高赴召大異之曰此不特良將且

良吏也遷劉河遊擊改廣東高肇叅將調浙江舟山奉命征黎與總兵王鳴鶴用黑番為導搃其朝黎乃滅舟山居大海中元時建昌國州為浙東要害可大修軍政自岑港抵歷海三江皆置戍倭犯五單湖白沙港茶山潭頭連敗之加副總兵城久圯可大興副使蔡猷臣築之兩月訖工城內外田數千畝海潮日害稼可大築碶蓄淡水遂為膏腴居民名之曰張公碶天啓元年以都指揮使掌南京錦衣衛有歐陽暉者素強項由刑部主事調本衛知事嘗賦詩有陰靈國事之非句揚州知府劉鐸書之扇以贈一僧惡鐸

者諧之魏忠賢暉鐸俱被逮可大為約束旂尉捐俸  
助之卜室處其妻子暉後獲雪搏顴以謝六年擢都  
督僉事僉書南京右府崇禎元年出為登萊總兵官  
會有裁登萊撫鎮議當事惜其才命以總兵官視登  
州副總兵事而巡撫遂罷不設二年春毛文龍忽擁  
衆至登州聲言索餉可大卑舸往迎責以大義文龍  
乃逃及袁崇煥戮文龍其部下洶洶可大嚴備迄無  
敢渡海者白蓮賊既滅餘黨流劫招遠棲霞圍萊陽  
可大擊破之獲其偽國公二人圍遂解京師被兵可  
大入衛命守西直廣寧諸門明年二月加都督同知

時京東城郭多失守可大方與諸帥圖恢復會劉興  
治反東江遂奉詔還鎮已而四城並復朝議復設登  
萊巡撫以孫元化為之元化率關外八千人至強半  
皆遼人可大慮有變屢言于元化不聽四年七月錄  
前守城功進右都督十月僉書南京左府兼督池河  
浦口二軍登人相率留之未去而孔有德反吳橋東  
陷六城可大急往勸元化撤止之不聽次萊州遇元  
化復為所阻乃還鎮歲將晏賊兵暮薄城可大請擊  
之元化持撫議不許可大陳利害甚切元化意稍回  
期明歲元日發兵合擊至期元化兵不發明日合兵

戰城東可大兵屢勝元化部卒皆遼人與賊親故無  
鬪志其將張燾先走可大兵亦敗中軍官維城遊擊  
陳良謨等陣亡燾兵半降賊賊遣歸為內應元化開  
門納之可大諫不聽夜中賊至城遂陷可大時守水  
城還家叩首母前令部將殺其婢妾遂投繯死事聞  
贈特進榮祿大夫太子少傅謚莊節賜祭葬予世廕  
建祠曰旌忠可大好學能詩敦節行有儒將風第可  
仕字文峙以字行隱居博學嘗輯明世布衣詩一百  
卷

何可綱遼東人天啓中為守備典袁崇煥寧遠道中

軍廉勇善撫士卒六年寧遠被圍佐崇煥有功進都  
司僉書明年再被兵復堅守遷叅將署寧遠副將事  
崇禎元年巡撫畢自肅令典中軍及崇煥再出鎮復  
以副將兵典其中軍十三營之變佐崇煥捕誅首惡  
崇煥議更置大將言臣昔為巡撫議關外止設一總  
兵因魏忠賢盜柄崔呈秀欲用其私黨遂增三四人  
卒之權勢相侔臂指不運乃止留寧遠及前鋒二人  
然臂指之不運猶故也臣以為寧遠一鎮決當併歸  
前鋒在關內者掛平遼將軍印轄山石二路而以前  
屯隸之在關外者掛征遼前鋒將軍印轄寧遠一衛



而以錦州隸之薊遼總兵趙率教久習遼事宜與山海麻登雲相易掛平遼將軍印關外總兵舊有朱梅祖大壽梅已解任宜併歸大壽駐錦州而以臣中軍可綱專防寧遠可綱仁而有勇生平不破公錢不納私餽敵衣攜食不異士卒且事至善謀其才不在臣下臣向所建豎實可綱力請加都督僉事仍與臣中軍則一鎮之費雖裁一鎮之用仍在臣妄謂五年充敵止伏此三人用而不效請治臣罪帝悉從之佐崇煥更定軍制歲省餉百二十萬有奇以春秋二防功再進右都督二年冬京師被兵與大壽從崇煥入衛

數有功已崇煥下吏即偕大壽東潰復與歸朝明年  
永平灤州失守可綱連戰古冶鄉及雙望頗有斬獲  
四月拒輔孫承宗令可綱督諸將營雙望諸山綴永  
平之師而令大壽等諸軍直趨灤州未幾灤州破

大清兵棄永平去可綱遂入其城論功加太子太保  
左都督己而錦州被圍可綱督諸將赴救立功郵馬  
山復進秩四年築城大凌河命可綱偕大壽護版築  
工甫竣

大清兵以十萬衆來攻可綱等堅守不下久之糧絕  
援盡大壽及諸將皆欲降獨可綱不從十月二十有

八日大壽令二人掖出城外殺之可綱顏色不變亦  
不出一言含笑而死

黃龍遼東人初以小校從復錦州累官至叅將崇禎  
三年從大軍復灤州功第一遷副將兵尋論功建秩  
三等為都督僉事世廕副千戶登萊巡撫孫元化以  
劉興治亂東江請龍往鎮兵部尚書梁廷棟因言龍  
昔攻灤功冠諸將乞用為總兵與元化恢復四衛從  
之先是毛文龍死袁崇煥分其兵二萬八千為四協  
命副將陳繼盛叅將劉興治毛承祚徐敷奏主之後  
定兩協用繼盛興治語詳崇煥傳興治克狡好亂與

繼盛不相能其弟叅將興祚陣亡繼盛誤聽諜報謂未死興治憤念畿輔方被兵即為亂不能討三年五月偽為興祚設齋諸將咸吊繼盛亦至甫拜伏兵出執之并理執餉經歷劉一鵬等十一人袖出一書詭言繼盛誣興祚詐死興治懷異志將上之朝殺興治遂殺繼盛并殺十一人又偽為島中商民奏請優恤興祚令興治鎮東江朝中大駭以海外不能詰興治遂與諸弟放舟山島大殺掠島去登州四十里而登萊總兵張可大方援永平帝用廷棟奏趣可大還登州授副將用文郁大將印令撫定興治會永平已復

興治稍戢返東江龍泣皮島受事興治猶桀驁如故  
四年三月復作亂杖其弟興基殺叅將沈世魁家世  
魁率其黨夜襲殺興治亂乃定游擊耿仲明黨李梅  
通洋龍繫之獄仲明弟都司仲裕在龍軍仲明令作  
亂十月率部卒假索餉名圍龍署擁至演武場折股  
去耳鼻將殺之諸將為救免未幾捕斬仲裕疏請正  
仲明罪會元化劾龍刻餉致兵譁帝命充為事官而  
核仲明主使狀仲明遂偕孔有德反以五年正月陷  
登州招島中諸將同反旅順副將陳有時廣鹿島副  
將毛承祿皆從之承祿又招諸島將士龍急遣尚可

喜金聲桓等撫定諸島而躬巡其地慰商民誅叛黨  
焚賊舟甚衆賊黨高成友者據旅順斷關寧天津援  
師龍令聲桓可喜李惟鸞擊走之龍即移駐其地援  
始通其冬賊久困登州謀泛海去龍遣副將龔正祥  
率舟師四千邀之廟島颶風破舟正祥陷於賊後居  
登州謀內應為賊殺死有德仲明遂於六年春浮海  
遁去初龍駐旅順大治兵賊拘龍母妻及子以脇之  
龍不顧賊來襲禦敗之斬賊魁李應元生擒毛承祿  
蘓有功陳光福及其黨高志祥等十六人獲首級一  
千有奇奪還婦女無算有德幾獲而逸獻俘于朝帝

大喜礫承祿等傳首九邊復龍官承祿文龍義子也  
有德等大憤欲報龍會賊舟泊鴨綠江龍遣水師征  
之旅順空虛七月有德等遂引

大清兵來襲龍數戰皆敗火藥矢石俱盡語部將談  
應華曰城郭未堅敵衆我寡今夕城必破若逆持吾  
印送登州不能赴即投之海毋為敵所得應華出龍  
即率遊擊李惟鸞等力戰被圍知不能脫自刎死惟  
鸞及諸將項祚臨樊化龍張大祿尚可義俱死焉帝  
贈龍左都督賜祭葬予世廕建祠顯忠惟鸞等附祀  
以副總兵沈世魁代龍為總兵官世魁本市僧有女

絕色為文龍小妻世魁倚勢威行島中文龍死女歷  
事三帥世魁權益重至是為大帥七年二月廣鹿島  
副將尚可喜降於

大清島上勢益孤十年朝鮮告急世魁移師皮島為  
聲援有德等來襲世魁戰敗率舟師走石城副將金  
日觀陣沒登萊總兵陳洪範來援不戰走世魁亦陣  
沒失亡將士萬餘人從子副將志科集潰卒至長城  
島欲得世魁勅印監軍副使黃孫茂不予志科怒殺  
之并殺理餉通判邵戩副將白登庸率所部降  
大清諸島雖有殘卒不能成一軍朝廷亦不置大帥



以登萊總兵遙領之而已明年夏楊嗣昌決策盡遷  
其軍民於寧錦諸島乃空